

周莊鎮志

周莊鎮志卷四

里人陶煦重輯

風俗

吾鎮在晉唐時本係村落風俗清嘉爲張季鷹陸魯望釣遊之所宋元後闢成市鎮歷有明入國朝又二百餘年太平翔洽生齒日繁居人皆安其土樂其業以勤儉相勗近自粵寇旣平積漸奢麗如周書所謂服美於人者比比然矣

明季以來士人崇尚氣節好持清議出身犯難不避艱險外此亦多慷慨慕義者迄今遇有勝舉必同心協助或爲俗患恒勦力攻除其遺風猶存焉

近地之人在鎮者業商賈習工技爲多在鄉者鮮不務農然農

日貧而工商因之亦貧其故在田租之重又益以十數年來之穀賤也顧茲事重大而頗繁碎非千百言不足以盡其弊爰附論於下以備關心民瘼者攷焉至於游手之徒亦在鎮多而在鄉少婦女則皆以木棉爲紡織間作刺繡未有嫻蠶

桑者矣

附重租論顧亭林日知錄言吳中私租之重竊嘗讀而歎焉不謂今之私租有更甚於亭林所言者請案

實而詳論之吳農佃人之田者十八九皆所謂租田然非若古之所謂租及他處之所謂租也俗有田底田面之稱田面者佃農之所有田主祇有田底而已蓋與佃農各有其半故田主雖易而佃農不易佃農或易而田主亦不與有時購田建公署架民屋而田價必出主與佃農兩議而瓜分之至少亦十分作四六也又田中事田主一切不問皆佃農任之糞壟工作之資約畝費錢一緡穀賤時亦七八斗之值也三春雖種菽麥要其所得不過如傭耕之自食其力而無餘一歲僅恃秋禾一熟耳秋禾畝不過收三石少者止一石有餘而私租竟有一石五斗之額然此猶虛額例以八折算之小歉

則再減追同治二年朝廷從合肥李伯相之請下詔減
賦蘇松減三之一於是田主聲言減租以虛額之數畝
三斗故向止一石二斗而無增者今亦一石二斗而又將催
甲等錢增入一二升於其外催甲者田主備之以給佃農租
絲單佃農或不至則用以催租者而亦責佃農代償其值
是賦雖減而租未減租之名雖減而租之實漸增正如元史
成宗紀江浙行省臣所言恩及富室而不破及於平民者也
最可異者納租收錢而不收米不收米而故昂其米之價必
以市價一石二三斗或一石四五斗之錢作一石算名曰折
價卽有不得已而收米者又別有所謂租斛亦必以一石二
三斗作一石而收租之期自來以十日爲一限三限而止頭
限則讓租一斗依次遞降所以獎佃農之踴躍者今乃惟恐
租之有讓也田不至十月方登場而租限已自九月中始及
其脫粟出糶則租限早滿無毫髮讓矣彼佃農非草木何能
隱忍而甘之於是有一歲中稍紉其數者有數歲中偶紉其
數者更有有故而致後其時者司租之徒欲求媚於主人於
佃農概不寬貸惡聲惡色折辱百端或豫挾悍隸入鄉收租
一不如欲出縲綬而囚之甚且有以私刑盜賊之法刑此佃
農其所以窘迫之至於斯極者非有積怨深仇也欲使人人
知警盈數而不敢抗又欲使若人之親故或憐憫而出爲調

停也如是而仍無所得然後解而送之於官夫尋常戶婚田
 土之事定例丞佐官不得專擅又凡有罪者不論大逆不道
 皆容訴獨至追比佃農則不然卽或情實可原如疾病死喪
 之故致種而弗耨耨而弗穫而無以納租納租而不充其
 額者往徃而有以天理人情論之自宜寬其既往待其將來
 何乃訴詞未畢而行刑之令早下矣況田主控一個農止給
 隸役錢數百而隸役之索賄於佃農者初無限量身或田主以
 隸役行刑不力倍給之錢至有一板見血等名目俾佃農血
 肉飛流畏刑伏罪雖衣具盡而質田器田器等盡而賣黃犢物
 用皆盡而鬻子女亦必如其欲而後已傷心慘目有如是耶
 如是追比而終不能如其欲則田主之狡黠者更逮及佃農
 之伯叔兄弟稍有生計而柔懦者責之代償或不然則以所
 欠缺之租數強作田面之價竟奪而別售他人以佃之再不
 然則擇土豪而減價售之或擇善堂之有勢力者而助之而
 田主之過戶易券同租者之滙租均責令佃農償之錢多者
 畝至十五六百少者亦千錢上下夫土豪不足數矣善堂或
 名清節或名保嬰類皆攤田千百畝而收租亦如上所云云
 獨不思租重而農無以爲生雖有節婦飢寒迫而失守雖有
 嬰兒勢亦不得不溺豈所謂作善者耶佃農非無頑梗翫法
 者原不能不擇尤懲治然重其租額苛徵不休使人犯之而

刑之卽孟子所謂罔民也故歲以一縣計爲賦受刑者無幾
人爲租受刑者奚翅數千百人至收禁處有不能容者三冬
自古稱息民之時今乃盡驅貧者而就桎梏設於此有下車
問其罪者則彼固終歲勤動之人也昔雍正三年怡親王奏
免蘇松錢糧四十五萬當時戶部會議杭光祿奕祿請十分
中減免佃戶三分照條折米一斗折銀一錢之例業戶得沾
三十一萬五千兩之恩佃戶亦得沾十三萬五千石之恩矣
詔依議速行誠使奏請減賦時亦有以杭光祿之說進者
則伯相疏中固稱亂後田盡荆榛遺黎鵠面鳩形奄奄待斃
之狀非鄭俠流民圖可比明明爲農民不專爲田主也賦減
三之一租亦減三之一若以實額計適如亭林禁限私租上
田不得過八斗之說卽以一石五斗之虛額計則租亦祇一
石而已更可異者賦有九則而租獨一例試以吳江之下下
田而論納一升五合有奇之賦而亦收一石有餘之租此尤
事之不
平者矣

自來四民之蠹惟賭博一事至變其局而爲鬪蟋蟀鬪鷓鴣亦
賭博之濫觴也然皆可以時行時止獨鴉片煙之流毒則不

然損體耗財廢時失事卽至喪殮不給衣履不完仍陷溺而不能返其犯此者大抵以酒色爲媒翳間有以療病而成癮者吾鎮固圉幾成列肆近雖令甲示禁恐難塞此漏卮也

今人以笄女爲上頭實則上頭者乃男子加冠之義見齊書華寶傳惟女子之笄於將嫁前一日尚行之未變而冠禮已畧而不講向時童子祇戴小帽十六歲以上始戴大帽近有八九歲後卽戴大帽者鎮西南屬吳江之地則於將婚前一日延親族之尊者命之冠猶遵古制

古之婚禮今人幾不之知而遺意實存特先後次序不同耳初議婚媒氏乞女子生日曰討八字卽古之問名也以女子生

日與男子生日推其星命曰占合古納吉之變也既許婚用
笄及幣帛茶棗等物具禮帖曰纏紅取赤繩繫足之義亦曰
行小盤女家答以冠履等物曰回盤古女家無回禮始見於
夢梁錄今從之也或不行小盤僅用笄及銀錠曰文定此二
者卽家禮所謂言定古之納采也將婚先數月用衣幣首飾
等物並告婚期曰行聘亦曰納幣或并纏紅行聘爲一而僅
告婚期曰導日古之納徵請期也女家回禮曰報幣婚期前
一日婿家送冠帔首飾曰肅妝亦曰催妝與東京夢華錄所
載同也女家以衾帷茵褥器用張陳其婿之室曰行嫁與書
儀同也及期女家笄女而醴之以待嫁婿盛服父祭告祖先

及神祇左傳所謂布几筵告廟者是也惟古告祖而不告神
今異也既昏遂具儀從綵轎鼓樂隨之命子往迎曰發迎親
朋衛之同行曰護親郡城鮮有親迎者而近地雖水行數十
里無不親迎俗近古也古不用樂今從通禮也壻至具門儀
上見帖主人乃使子弟一人爲擯迎於門外揖讓升堂先與
擯並拜相見擯導入別室欸以茶果綵轎入女加幃蓋首父
若兄掖女入轎擯導壻至轎前再拜奠雁俗稱曰拜轎轎乃
行古入門後卽奠雁女升輿壻先出今先後異也壻俟於堂
謁妻父母曰請見妻父母辭擯揖讓送出古親迎不見妻父
母而伊川定昏禮有中堂見女之尊者一節今請見而不見

執二者之中也婦至壻門媵導自西階升與壻並立於堂御
及媵授綵巾於媵婦手牽之以見舅姑古入門不見舅姑今
從書儀也舅姑出北面先拜曰參祖然後南向受子婦拜曰
拜堂唐王建詩所謂我家新婦宜拜堂是也舅姑退壻與婦
交拜曰結親古無交拜今從家禮也設饌於堂列絳燭壻揖
婦入席南向並坐曰結花燭媵取盞杯實酒醕壻御取盞杯
實酒醕婦曰交杯古之合巹也擇親朋中子弟二人挽之執
燭前導曰迎花燭壻與婦隨燭入鼓樂從之曰送入房所入
處以米袋布地曰傳代輟耕錄所謂傳席也入房姑爲婦脫
幃曰挑方巾通禮脫幃姆爲之在交拜後合巹前今異也壻

婦就牀坐婦女以綵果散擲曰撒帳見戊辰雜鈔所載蓋始於漢武帝也是夕壻婦坐以待旦曰守花燭俗視花燭最重故稱從一者爲花燭夫妻也厥明設祭於堂主婚者引壻婦及合族夫婦謁先祖曰祭祖卽古之廟見然古三月廟見家禮改月爲日今異也壻引婦徧謁親族曰會親舅姑饗婦娣姒小姑及諸女賓侑之曰花筵古醴婦之意也婦饋棗栗飡飴等於舅姑曰送茶古盟饋之意也自祭祖以下或有併行於婚夕者越數日父若兄具禮來壻家曰望朝彌月婦歸甯壻同往見妻父兄及妻黨曰回門公羊傳所謂雙雙而俱至者是也此婚禮之大畧也惟習俗貪鄙娶婦問妝資厚薄嫁女問聘財多少

士大夫家往往亦若是伊川所謂夷虜之道君子不入其鄉者也可不戒哉

喪禮重於婚禮世俗畧而不講今舉通行之無大謬者著之人

始死舉室男女各以所稱長聲號呼曰叫魂古復之遺也諸

子婦乃撫尸哭踊侍者奉湯入哭止婦人出

女喪男子出

遂去尸

衣濡巾徧拭其體曰揩身上古之浴也衣尸以裏衣遷於堂

中曰轉出來言自寢及堂轉輾奉尸而出卽古之襲及俛堂

也喪主以下哭踊爲尸櫛沐薙髮

女喪梳頭

古沐與浴同時今異

也兩足繫屨拘以斗令直至斂易以韠古毀竈綴足之遺也

以銀屑糯米實尸口古之飯含也以白布爲帷曰孝堂古之

帷堂也死者有長上則帷以青布子去冠被髮以幅布環首垂餘及踵曰長白布以牡麻蒙履曰屨孝鞋婦女去笄冠履如男子蓋變除之節以漸而加猶古人意也置靈座以尺帛爲靈位書曰某官某公之位

女喪書某封某氏

供於帷前曰牌套卽

古重之遺通禮所謂爲位者是也畫衣冠像懸之曰揭白古無畫像故溫公非之然萬充宗所謂傳神楮墨洋洋如在者其亦可也以絳帛爲銘旌書曰某某之柩如靈位式卽古之明旌凡弔輓者用聯額或祭幛皆明旌之推行也親朋聞喪至曰探喪或助以布帛曰送襄布或助以楮幣曰送襄楮古襚之遺也楮幣卽紙錢及金銀楮錠始於魏晉故通禮載之

也喪家遺以白布在五服內者遺以首絰要絰旣成服遺以
白衣曰孝白款以蔬食豆腐爲之主曰啜豆腐古之親朋各
以其服弔今乃喪家給之通禮待客以茶今乃食客滿座是
卽張稷若所譏賓客之飲食衣服不敢不豐者也三日成斂
古小斂大斂各有衣衾今存其名實并爲一事也斂用禮服
冠帶古之死者不冠但用掩書儀改用幅巾今從通禮也成
服子括髮以麻曰麻辮線婦女榛笄髮以麻曰麻髻圈喪冠
曰麻孝免衰服曰麻孝衫苴屨要絰其餘所服以次而降古
大斂後成服今異也親朋至是入弔或以香燭牲醴庶羞或
以貨財曰送斂古之奠及賻也執事者以棺入棺內家禮用

瀝青米灰加七星板今易以石灰無板也石灰之上鋪以紙
紙上藉茵褥或以帛或以布曰香花被褥古實以茅秀香草
故名今易以木棉也富者斂尸以衾貧者無之喪主子婦奉
尸首足入棺以紙卷石灰塞空處令充實平滿曰小葬通禮
卷衣爲之今亦易以石灰也喪主以下撫棺哭踊乃蓋棺曰
脂蓋加錠富者施以漆貧者以桐油殯於家或權厝於野曰
出殯殯後朝夕哭奠焚楮幣日中上食古之朝夕奠及上食
也每七日一祭共七七曰曰做七古無七七之說其名起於
僧家始見於魏書胡國珍傳也至二七前後視死之日定爲
回省之期白寢至堂至門皆設食婦女聚哭曰接音音卽唐

博士李百才所謂煞其名起於道家惟魏志之避袁顏氏家訓之避煞皆背其死者而避之而近地獨以接稱猶爲彼善於此也五七日塋女具紙神室以供靈位曰上座亭古明器之推衍也葬無定期或於五七古之踰月而葬也或於百日書儀諸書之三月而葬也營葬地擇葬日先期發訃聞卽古之赴也或發知單親朋及期會弔奠賻曰開喪或不赴不弔曰偷喪言不使人知如偷竊然也柩無輓惟以杠縛之舉柩役人或八或六或四喪主奉靈位以下皆哭從及墓下壙臨穴哭盡哀遂窆曰封金門士大夫家具誌石是日作神主及主櫨擇宗親善書者一人題主書儀諸書皆題於墓前今在

葬前題於喪次也喪主奉靈位以下皆行哭歸曰回喪復靈
位於神室而木主供於前喪主以下聚哭古之反哭也明日
祭卽虞祭古埋重於此時今靈位亦宜如之乃與木主並供
是二主矣居喪初值清明親朋奠賻曰寒食盤七月望至戚
清晨臨奠曰敲門羹飯夏至焚紙牀曰張帳子冬至焚紙榻
曰翻綿被皆設饌哭奠謂之新時節朞而祭曰周年古之小
祥也再朞而祭曰二周年古之大祥也二十七月而禫焚靈
位及座亭曰除座親朋拜奠曰送座奉木主入家堂供於祖
主之下曰送人祠家禮大祥之祭如此更有埋遷主一節今
異也至是而喪禮畢矣若夫乘喪婚娶居喪飲醺律有明文

稍知禮者當不出此餘如信僧道祈懺度或亦人子不忍死其親之所爲無庸過責也已

宗祠爲近地所鮮故祭禮愈畧奉神主者惟有所謂家堂而已家堂雖亦如朱子之長龕堂而中無板隔自始祖以下之主皆在又高懸梁棟間祭時不能出主每歲於二至日清明節七月望十月朔除夕設案於廳事合始祖以下薦饗之杯箸鱗次至有一案而列數十者曰過時節非古也至清明日具酒饌詣墓拜埽曰上墳通禮有或霜降一語故郡城更於重陽節拜埽吾鎮不行也插紙旛於墓上曰飄白會典載官民不得用墳花墳花者以紙錢飾采繒爲之與紙旛異也此皆

祭先也然於淫祠之祭則又務從豐潔如陳三姑娘及近所傳之莊家圩神

詳雜記

牲醴充溢男女駢闐士大夫家亦趨之

若狂何耶

四時之俗此地與郡城間有不同今卽袁宏道歲時紀異損益之元旦爆竹啟戶潔衣冠拜神祇與竈次及祖先像後拜尊長遞至親朋寺院進香食粉丸年糕立春亦是日不敲火不汲井不埽地五日起五路神以祈財利自子至辰爆竹不絕聲元旦以後數日各鄉村社會徧詣鄰社留以茶酒曰土會場亦有至鎮中猛將堂者十五日上元節食油餠粉丸懸巧樣紙燈於街市或有龍燈馬燈之戲金鼓喧填不息曰鬧

元宵鄉人於田中立竿木用稻草夾爆竹縛其上舉火焚之
曰燒田財卽照田蠶之意也二月二日食撐腰饅十九日觀
音大士誕辰尼庵多作佛會六月十九日九月十九日亦然
清明插柳埽墓食糴子踏青奉城隍土地神詣鄉厲壇致祭
曰祭壇會七月望十月朔亦然三月三日澄虛道院聖帝會
插齊花二十八日天齊王誕辰東嶽廟左演戲三日近鄉田
作多停工來遊俗稱長工生日入春以來各鄉村次第演春
臺戲幾無虛日所謂迎神賽會則樂趨醪錢演劇則不吝也
立夏飲燒酒食櫻桃梅子麥仁海螵試葛衣云可免疰夏以
大秤權身輕重四月八日全福寺浴佛會十四日純陽誕辰

翦千年藍葉散置門前食神仙饌端午貼印符懸鍾馗或天
師像繫蒲艾於牀并作瓶供食糗子黃魚飲雄黃酒簪榴花
繭虎赤小豆健人以辟邪焚蒼朮白芷以驅蚊蚋十三日澄
虛道院關帝會九月十三日亦然十八日五方賢聖會各方
次第奏樂供奉六月初四日十四日二十四日俱祀竈初六
日食索麵餛飩滌器具曬書畫浴貓狗二十三日東嶽廟火
神會二十四日澄虛道院雷祖會七夕設瓜果於庭乞巧穿
鍼採鳳仙花染紅指甲十五日中元節永慶庵盂蘭盆會晦
日地藏王誕辰全福寺焰口施食各家門前點地燈中秋以
月餅相餽遺澄虛道院斗姥會至晚設宴賞月焚香斗於庭

短曰施音晏此皆所謂方言也

人物

晉張翰字季鷹世居鎮東南吳江縣二十九都之二崙港父儼仕吳至大鴻臚翰自洛歸來營別業於楓里橋朝暮往還觴詠靡閒宅東帶水因稱爲尊鱸港今兩村張姓仍聚族而居按晉書載翰有清才善屬文而縱任不拘時人號爲江東步兵會稽賀循赴命入洛經吳門於船中彈琴翰初不相識乃就循言談大相欽悅問循知其入洛曰吾亦有事北京便同載卽去不告家人齊王冏辟爲大司馬東曹掾冏時執朝權翰謂同郡顧榮曰天下紛紛禍難未已夫有四海之名者求退良難吾本山林人無望於時子善以明防前以智慮後榮

執其手愴然曰吾亦與子探南山蕨飲三江水耳翰因見秋風起乃思吳中菰菜蓴羹鱸魚膾曰人生貴適志何能羈宦數千里以要名爵乎遂命駕而歸著首邱賦俄而問敗人皆謂之見幾翰任心自適不求當世或謂之曰卿乃可縱適一時獨不爲身後名耶答曰使我有身後名不如卽時一杯酒其曠達如此性至孝遭母憂哀毀過禮年五十七卒有文筆數十篇行於世

朱周迪功郎佚其名字吾鎮自迪功郎收穫設莊於此遂成大聚落故名周莊元祐元年迪功郎及妻章氏捨宅爲全福寺其餘事實無攷矣

金和世稱二十相公本汴人隨宋高宗南渡僑居於此其子細官太尉歿皆爲神理宗朝嘗著靈異封靈祐侯細之子昌封總管昌之子元七元和縣志作元士與昌之從子應龍元至正間陰翊海運皆封總管再進封昌爲洪濟侯元七爲利濟侯應龍爲甯濟侯明封隨糧王其墓在金家蕩村旁有總管廟村亦因是得名也

明沈富字仲榮一名秀世稱萬三萬三者乃鉅富之名萬戶三秀耳故又稱萬三秀父祐元季由湖州南潯鎮徙居鎮之東垞以躬耕起家富亦嘗力穡事能推恩以周急難人皆以長者呼之至其富甲天下吳江青浦兩縣志謂得分湖陸氏家

財而挑燈集異有聚寶盆之說近峯間畧有善點化術之說
或又謂通番致富異議紛岐然卒以富賈禍按明史馬后傳
洪武時富民沈秀者助築都城三之一又請犒軍帝怒曰匹
夫犒天子軍亂民也宜誅之后諫曰妾聞法者誅不法也非
以誅不祥民富敵國民自不祥不祥之民天將誅之陛下何
誅焉乃釋秀戍雲南又七修類藁云南都沈萬三秀者甚富
今會同館是其故宅後湖中地是其花園原住蘇京城中白洪
武門至水西門乃其所築太祖嘗犒軍萬三欲代出犒銀上
曰朕有百萬軍汝能徧濟之乎對曰每一軍犒金一兩上不
許由此遂欲殺之太后苦諫得流雲南其壻余十舍亦流湖

州所載視明史爲詳

沈貴字仲華人以萬三之弟故稱萬四初居東垞繼遷白蜆江濱之黃墩港屬吳江縣據高士奇天錄識餘載貴不事生產曾作詩諷其兄云錦衣玉食非爲福檀板金樽可罷休底事子孫長久計瓦盆盛酒木棉裘後隱終南山不知所終

徐民望號南溪洪武初富人沈萬三因事被逮多所株連謂欲盡誅周莊居者人情惶懼民望奮然不避鈇鉞叩關哀請太祖嘉其志賜璽書五字云爾是好百姓合鎮得安羣感其德稱再生父母由是世爲糧長

諸質字叔義世居鎮東北之穎村吳庠生永樂元年癸未舉人

壬午六月靖難兵起是年補試

爲永年教諭改慶元遷國子監學錄進監丞

擢翰林院編修仍理監職以丁憂歸遂請老按姑蘇志載質爲人誠信端直每事審義而行恂恂引退若懦夫至論事裁決侃然不撓陳敬宗爲祭酒剛嚴少許可質以事請輒降顏談講質居錄常攝丞居丞常攝堂事同輩嫉之伺察終無疵可指人以厚德稱之

徐正字惟中

府志作
爾中

世居鎮西吳江縣之江澤村

據徐氏族譜
載中山王弟

孟清之
元孫

正統六年辛酉舉人七年壬戌進士與韓襄毅公雍

鄉榜同年甚相契合官至刑科給事中英宗北狩正主喪君有君之議與王文等謀立景帝追上皇奪門復位與于忠肅

公謙等同下獄被害

戴昇字景輝號東軒由諸生貢入國學授鴻臚寺昇甫冠卽銳志儒業博通經史其在鴻臚寺以應詔言政事激烈忤旨歸田性孝友好施予教子必擇文行兼優之士族有婚喪不能成禮者必力助之歲饑則出粟以賑貧乏垂老舉鄉飲賓卒年六十有九郭盼誌其墓孫暉號南園嘗卽其家開陂池園亭與親朋共娛暇日無何倭警寇發竟遭一炬

王璧字廷用號南溪家素封宅心仁厚遇歉歲施惠已債遠近依之爲生好修建橋廟如全福寺澄虛道院崇先庵等及鎮中太平橋皆高貲樂輸爲衆人倡而自奉又頗儉約顧澗澤

爲撰行義記僧法雲勒石於指歸閣下

陸湖字思周居恆開誠布公慷慨好義萬厯間爲祖塋事與鄰豪訐訟赴南京察院歲杪未歸除夕薄暮見有官舫旗書蘇州府正堂私懇附載舟人詢姓名入稟報可旣登舟戒勿言時昏黑無所見惟聞蕭瑟聲心竊異之潛以手探乃經樹杪上行未幾曰至矣促之登岸則在閭門城外市火輝煌元旦詣郡廟拈香見神船上所遺雨傘尚在所食棗核亦在船艍因祀神於家并顏其居曰神濟堂白是鎮中三節祭鄉鴈壇之飯俱陸氏供應至今遵之

陸紹奎字文星湖從子善測候精數學長子三山得罪魏閹私

人金紹叔幾致奇禍崇禎元年減罪遠戍由是紹奎相
授不與世務素好園藝遠近稱高手諳修養之術壽至九十
五歲

金允治字際昇江庠生自千步涇遷居江澤村嘗訟其叔冤爲
怨家所陷繫獄三年手不釋卷潘兵部有功救之得免攜入
都崇禎三年順天試許錦衣衛子弟預文場額中三名蓋特
典也允治遂冒錦衣衛籍得中同舉者高岱余世灝皆南人
典試則姚文毅公希孟有給事中王猷相溫體仁黨也卽疏
糾希孟私庇鄉里并劾諸勳衛同詞許奏將中以危法得旨
覆試御殿午朝後命題申刻撤卷高余皆以稿未竟遣戍允

治立成三藝辭藻斐然論旨稱賞名動京師文毅公亦藉以
無恙後官晉江知縣

徐御字正吾爲人敦倫睦族樂善好施凡橋梁廟宇有待於修
造者靡不竭力從事永安橋乃其獨建崇禎元年佐本覺僧
修造永慶庵勒石殿左所交多賢士大夫善行聞當道晚歲
陳太守洪謐爲書冠冕人倫額以旌之

徐時亨字龍池民望五世孫官江西南安府大庾縣縣丞大吏
稱其能繼署大庾縣事清廉勤愼多惠政民咸誦之將推陞
而時亨見世事日非遂以老病告歸崇禎十二年卒年七十
有六

陳鏞字元聲性豪爽體魁梧膂力過人曾於全福寺左連拔巨竹七竿人稱爲陳勇士崇禎晚年荒亂多盜鏞創團練以衛鄉里甲申間變北向大慟遂晦迹以歿

戴之儁字務公號介心昇七世孫長庠增生入國子監 本朝

順治二年閏六月薙髮令下長洲諸生陸世鏞陳墓鎮人也首起義兵於陳湖之儁係陸氏壻亦捐家貲募舟師一旅屯

鎮中以應之未幾松江提督吳勝兆

魏源聖武記作兆勝

統兵下湖世

鏞走湖州山中之儁遂降勝兆本降將雅重知名之士之儁因入其幕爲參謀又與裨將李魁等爲石交晨夕說以大義勝兆乃復爲明臣監國魯王授之儁監軍御史七月兵敗爲

洪督師承疇所殺家屬并及焉事載顧炎武聖安本紀

戴之傑字萬公號石房之僑弟長庠廩生才高學博弱冠爲諸生卽名噪藝林恆與及門暨里中子弟會講五經攝衣升座聲出金石雖老師宿儒皆爲之執經問難其辨對多出人意表志廉潔立品更端方拔俗人皆以遠到期之惜不永年字法鍾王亦擅絕一時

戴鎬原名之仍字雲葉號侯庵之僑幼弟十五能文章十八入長庠師事其兄之傑淵源家學時有大小戴之稱順治辛卯浙闈擬元爲忌才者所黜鎬爲人倜儻好義歲己亥值海寇之警松江提督馬進寶擬乘作惟善擁兵至蘇與紳士顧子咸有

隙以語吏部顧贄將甘心焉擐甲以待時訛傳屠城居民皆走匿鎬與贄弟贊入馬軍爲排解進寶方食引卮酒命作軍容詩曰酒盡詩不成當斬以徇鎬立撰五言四十韻進寶喜問所從來因從容曰予咸請罪狀進寶意解事遂寢城中亦賴以安嘗至燕京名動公卿著有燕臺草其從弟悅字星歸號素齋原名之儵榜姓吳順治辛卯科舉人考授司李負性癡狂行多蕩檢因卒於獄事載雜記內

戴之佐字在公號留庵之儻從弟長庠生嘗與楊廷樞朱隗葉襄魏風諸名人結文會極爲徐宮詹汧吳祭酒偉業所推許甲申後棄舉子業潛心經史託迹市廛如在山谷間所居四

留草堂茅茨不葺恆日晏無炊烟意澹如也教授生徒講論
未嘗有倦色詩古文詞得栗里輞川之致時其族兄笠結驚
隱詩社之佐與焉工二王法書求者無虛日先後居父母喪
哀毀骨立幾至滅性順治丁亥遭家難諸兄弟所遺老幼俱
妥爲位置力勸族黨周恤使無失所生平重然諾尚名節型
仁講讓晚歲湯文正公斌舉爲鄉約正卒年八十有二

屠彥徵字君聘號赤水長庠生早歲文名藉甚甲申後屢遭播
遷晚年與陶唐諫鄭任方九皋沈自鳳徐汝璞管淵丁社僧
廣明九人踵香山故事爲耆英詩社彥徵執牛耳云

鄭任原名國任字葑房自崑山遷居鎮中介庵五世孫也世習

女科醫工詩精音律善畫花鳥晚年嘗與屠彥徵毛瑩徐汝璞社集蘭芷軒時四人適三百歲乃取白香山四箇老人三百歲之句各賦詩二章瑩之子錫年繪四老圖以誌盛事張冷爲之序

徐國賢字嶽生號瓊沙正裔孫江庠生性剛直挫強扶弱不憚權勢與董宗伯其昌爲總角交故所藏詩札墨蹟尤多鼎革後隱居以終弟法亦江庠生孫玠字亦韓號息軒長庠生博學工書郡城徐夔稱之爲畏友課徒務經義晚年酷嗜古玩著有不息編玠弟琯字求章工詩文諳吏治楊文定公名時嘗疏薦之 聖祖召見以其不良於目遂放歸

徐上麟字長康正裔孫江庠生晚歲自江澤遷於鎮順治二年
明兵部主事吳易起兵時江澤盜魁潘況依附剽掠大爲民
害上麟直詣吳營陳盜狀吳立斬況以徇鄉里獲安康熙二
十年舉鄉飲賓壽登大耋其孝友睦恤詳馮太史勗所撰傳
子鈐字稚發府庠例貢生孝於親生事死葬各盡其誠吳江
漕運收兌屬民間里長苦之鈐偕陶天民沈作霖上書巡撫
請歸諸官一邑食其利也

徐汝璞字我石號雪漁晚號寒齋御姪長庠生 本朝舉鄉飲
賓敦孝友嗜讀書寄情歌詠常與詩人衲子雨蓑煙艇出沒
白蜺江濱見者疑陸天隨張志和也弟汝珍字次玉號席庵

御嗣子國學生好任俠應試留都嘗揮千金結四方名流因與貴池吳應箕常州陳貞慧善馬阮欲殺二人幾及汝珍汝璞乃匿其弟避迹吳山不入城府所著有塞齋集懷友詩集松陵詩選年七十二卒吳江高人吳之紀誌其墓見元和縣志

本朝四義士亡其姓名順治間有劇盜四逸去官軍追至鎮中責民縛送期越夕弗獲當屠大索不得居人惶恐時有浙醫主僕寓此與里人某謀以身代新安客聞之亦慷慨與焉飾爲盜就戮於軍門合鎮得安而盜潛伏池荷葉底竟漏網事載擬乘同治間里人立祠以報也

陶唐諫字正吾明末自潯陽灣遷居鎮中嗜善無厭壯歲遇鄉
農葬其親於所佃田畔田主訟諸官令遷葬而無地唐諫割
已田與之有地師寓吳寄白金百兩於唐諫歸後三十年其
孫來吳詢之祖父俱歿邀至家出所寄還之封識宛然其孫
不知也鎮北急水港爲往來要津向無渡船人常病涉崇禎
四年唐諫設方舟以濟人并捐田以食操舟者至今稱陶公
義渡晚歲爲善益力賑飢者衣寒者藥病者棺殮者歲無虛
日初年四十二無子有相者曰君陰行善事當生令子矣越
歲果生子康熙二十八年胡太守世威舉鄉飲賓爲贈載歌
有斐額年九十一考終見四代兒孫邦人謂之備五福焉

張士隆字君茂號靜庵鎮西北張家港人好善不讓唐諫康熙丁巳大疫村人徧染無敢相問士隆按戶給藥全活甚衆庚申常州饑民至蘇傾倉濟之唐諫之設渡利涉也港在元和縣界舊屬長洲而吳江縣界之急水港均爲要津士隆亦割田設渡并設沈舍港渡船遠近橋梁或修或建補唐諫所未及緣此兩姓屢通婚姻至今數爲善者必推陶張云元和縣志與唐諫合傳

章永廉字允清順治初年擔米四金餓殍載道永廉時設米肆心竊哀之見襁褓貧人孤兒寡婦來糴者輒贏其所量之數或以錯告戒勿言人有失鬻女銀十兩號哭於路者永廉出

已銀以償之晚年坐卧一樓持齋奉佛後其家屢遭回祿此樓巋然獨存

徐梓宇良哉民望七世孫隱居養志廉潔不苟極與徐枋文蘭善詩酒往還無虛日嘗宿湖上草堂枋出鹽煮菰子下酒劇談竟夕蹤跡尤密故家藏枋之書畫甚多配沈氏通書史善彈琴頗得倡隨之樂晚年好誦金經著筆記並錄格言以示後子煊字懋昭吳庠生文蘭塤也事親至孝母病忘寢食經月不懈會病篤醫藥無效聞古人有割股療親者乃潛割之煮湯以進病果愈親族皆莫悉其所以瘳也既而知之羣以爲孝感所致康熙十九年卒年四十三時梓尚在鄉里爲之

惋惜同治八年題 旌孝子女慕貞適郡城管正僭 欽旌
節烈別有傳從弟懷恕字推之時亨孫任俠好義嘗遊學河
南歸至崇明時崇明令某貪婪殘虐民不聊生懷恕慨然不
辭艱險代民叩 閭請命令坐罪廢土人感其德立生祠以
奉焉然年未三十卒爲強暴所害

徐沂字魯南汝珍子長庠貢生品學兼優見義敢爲鎮爲蘇松
孔道督府遊兵往來如織拘民舟載官物復多所挾制居人
苦之康熙己未冬沂擒其渠魁號稟督轅治以軍法泐示諭
於石至今永賴湯文正公斌開府吳中以禮教化民尤重鄉
約所舉講者皆名宿郡博士趙某舉沂爲三畝約正朔望宣

講剴切解諭聽者爲之動容

張冷字浣心鎮北之狹港村人博覽羣籍長於詩文隱居陳湖之濱不交時貴常泛舟煙波間筆牀茶竈釣具孤篷人以小張志和稱之著有鷗莊集蔡方炳爲之序

徐楣字繡谷民望七世孫父廷璋字彥卿母周氏御史忠毅公宗建胞妹也楣有至性年十一父患背疽終夜侍立暑不揮蚊籲天請命疽旋瘳逾年父歿哭至嘔血年十八娶婦錢氏爲講說女孝經同心侍奉其母弟桃不才爲之娶并給貿易資楣一日賈於泖湖遇盜盜刃之若有物格之者盜詫爲異因得免人皆競稱其孝感孝廉沈作霖爲之傳同治七年題

旌孝子

鄒士和字熙若事親曲盡其誠有兩兄分宅而居不事生產俱早世二寡嫂三孤姪煢煢無依士和乃復與嫂姪同居以養以教歷久不衰兩兄宿逋變已產爲之償所遺田至三姪成人而歸之不損毫末臨歿謂其子曰我生平無善行惟奉二嫂守志撫三姪成立庶可對先人於地下矣

張理懷字一槐嘗於中夜聞有人自屋檐墜下燭之鄰人子也乃貽以布二端錢千文勗其改行善言遣去不以告人卽妻孥亦無知者後理懷年八十餘而歿其人已成小康殮之日特至靈前泣拜曰全名活命之恩沒世不忘孫見龍字次玉

吳庠生苦志勵學雖簞瓢屢空而一介不苟雍正乙巳全家
病疫見龍獨奉湯藥目不交睫者累月兄嫂同日歿經營構
瘞一身肩之居恆日記有對勘簿動靜之間無不謹飭篤行
君子也

沈作霖字蒼時

府志作
蒼如

吳江籍祖辨如庠生自楊坟頭村遷居

鎮中吳江田賦明萬厯間定爲九則至是高下漸亂積弊叢
生辨如請於撫院重整舊例泐石縣署至今遵之父澄源古
道照人嘗與徐友賈徐歿無子爲之養其寡妻終身不怠作
霖中康熙乙酉科舉人選授潁州學正勤於課士月試季考
嚴定甲乙朔望則集諸生爲之講論誘掖備至捐俸修葺學

宮並興舉歐陽文忠公蘇文忠公諸遺迹俸滿將陞卒於官
樞歸士子相送盈道且有哭泣者作霖工駢體文哀然成集
歿後散佚殆盡矣

陶天民字萬石唐諫子府庠增生少從郡城吳端仁愉遊甚器
重令與其弟一蜚結爲婚姻而同門如彭定求繆繼讓輩數
十人咸相推服每文會天民輒冠首旣而諸人接踵登第而
天民雖膺薦終至屢蹶亦不措意也居家敦實行有從兄兩
世早歿天民謹事寡嫂撫姪婦及遺孤終身不怠與戚黨往
來尤周密人以緩急告必應之雖傾囊無吝色生平孳孳爲
善凡以承父志又善排難解紛使鄉里無訟至其拯飢民建

丹塔尤擴前人所未及著有四書鏡策論定業卒年八十邛
州學正曹鉉爲之傳侍講習嚮作文以祭之嚮之父乃天民
弟子也長子屺思字陟山長庠例貢生選授盱眙縣教諭時
學宮爲大風所圯捐俸及贊儀以葺之營兩攝縣事賑卹災
民平反冤獄復以督建行宮得薦舉爲知縣旋卒於官入
祀名宦祠次剛惠字洪克就學於嘉善孫氏有茶庵者爲杭
州府教授卽剛惠妻父也剛惠居孫氏久遂占籍爲嘉善庠
生客授郡城及門多得高第監察御史馮欽元其尤著也雍
正壬子水災創義施粥勒石於永慶庵癸丑歲詔舉孝廉
方正邑尊將以其名應剛惠堅辭之次琳字惟一府庠增生

次仙感字甫生吳庠增貢生琳與仙感受業於何義門焯其後各以所學教人及門者甚衆

徐梅字若霖號南洲沂子府庠生舉博學鴻詞未赴試敦友誼重然諾長於古文與張大受何焯吳士玉諸名人善嘗結詩文社交相砥礪後諸人皆顯達而梅獨以一衿終士論惜之晚年館東洞庭山愛莫釐諸峯之勝尤愛封山荷花曰此藕花深處卽余家也僑寓十年而歸著有古文辭六卷南洲詩集六卷同邑李文銳朱奕恂爲之序長子穀字子位號澹園長庠生次敦復字賡良號研山吳庠生皆好學能文不遇於時

徐桂芳字幼張汝璞孫吳江庠生爲郡城宋宏博實穎高弟誠謹樸素酷似其祖博涉理學所爲詩亦高古著有晚香寓言二集馮太史勗爲之序族弟煥字天章持家儉約而性獨好施濟康熙間遷居同里鎮歲時伏臘與宗黨仍無間同里市中有一水頗闊舊架徒杠易敗且餒於行人煥慨之出金一千六百以建石橋名曰泰來鎮人感其義爲大書勒橋柱云貞豐徐天章獨建至今猶稱道弗衰

李培初性謹愿樸實無華家庭鄉里間恂恂相對未嘗有疾言遽色康熙三十五年秋大風海水頓溢橋傾舟覆不可勝數時培初亦在途中隨浪顛播舟不能維至黃昏入蘆葦叢而

止乃於風雨中匍匐登岸忽聞犬吠聲暗中影翳隨一大行
里許至一家見門間有火光叩之遂延入宿焉明日得無恙
歸人以爲忠厚獲天相云

楊成懋字振卿鎮西北搖城村人年方孩幼母病危籲天願代
母死旋刲股肉和藥進母病已治山搖城江以所入奉甘脆
侍膳堂下色怡怡然務得親歡心親歿幾滅性旣葬築室於
墓風雨辰必往展視牧豎感之弗往牧事兄友愛撫孤姪如
己子姊爲母鍾愛夫亡迎姊暨三甥歸教養備至甥長以舅
姓爲姓志不忘也里中薰其德稱仁里年六十六卒事見元
和縣志乾隆元年題 旌建孝子坊

諸國賢字公彥鎮東北穎村人孝友睦婣慷慨好義有故人寄五十金無知者逾年故人歿無子國賢以原金還其家封識依然農之佃其田者收租必量其歲之所得與賦之所出俾農有餘而已無過取故視他人之額獨減有宿逋手焚其券人或喪葬不能舉則資助無吝色或以貧故鬻其女於人爲贖而歸之尤善以息訟導里黨曰我以全人之身家骨肉也其所行類如此

朱文龍字雲奇鎮東北錢王浜人家頗登而能持之以勤儉生平務敦睦有兩兄嫂生養死葬皆一身任其責撫孤姪得成立出已田十數畝以爲族中時祭及展墓費餘如施棺木修

橋梁其所爲善類無不悉心力而行之與諸國賢相伯仲一鄉之善士也

汪文煥字仲雍其先本吳江舊族崇禎間自莘塔遷居至此文煥性孝友延師課其弟汪暎讀雖窘乏必竭蹶敬待以慰父母汪暎字霞石卒爲青庠生文煥之力也長子廷鏞字茂倫年十七而孤撫諸弟一如文煥奉祖父母尤加謹焉拮据十餘年躬創家業悉以均諸弟其妻徐氏若霖女亦甚賢淑及卒楊太史繩武爲誌其墓次廷鏞字茂功號樸庵國學生仁愛澤物凡遇善舉無不爲首倡鎮中懷善局亦其所建立也徐夢熊字應占汝珍曾孫祖偲字嘉民康熙九年水災民飢偕

陶天民請賑於中丞馬公復募米鎮中以給之全活無算夢
熊佐其舅氏麻城令勉齋吳公幕時有富戶爲巨盜所誣攀
夢熊檢牘細勘力請雪之邑人頌吳公爲神明旣而富戶知
其故愧古墨一雨夢熊已受之矣越日展玩見下皆赤金葉
子卽召其人還之由是廉名大著事載李太史錦日錄弟忠
亮字昭融號陶軒嘗至雲南初入慶制軍復幕府繼就銅廠
曹司補昭通府同知以能員稱旋坐賠累流於咸陽子紹庭
佚其名官直隸河間縣典史綽有父風

沈金聲字于野本姓方鎮西南吳江之龍涇村人早歲負文名
康熙庚子江庠歲貢生選授安慶府潛山縣訓導嚴立課程

以別優劣朔望講 聖諭必重以敦品勵學相勗持年以病
告歸

許寅字翼皇號西疇世居江澤村篤倫紀尚正直雍正三年考
授州同吳江徐邑尊永祐爲贈銓曹高選額以旌之早歲受
業於潘太史未與同邑李重華郡城裴桐交當 詔舉孝廉
方正時適重華自主試四川歸覆 命日卽疏薦寅旋以寅
丁父憂而罷子天祚字景運江庠生嘗與徐敦仁輯村中故
實成江澤小識一書每勝蹟各題以詩

鄒玉書學究也醇謹不欺以無虧曖昧之行是務嘗夜夢一人
攝之至城隍廟謂其出行犯神蹕神盛氣坐堂上詰責之玉

書曰幽明異路誤也非故也神命檢其籍註有不二色三字
神色霽命去遂寤因自號不二子

陳洪泉賈人也嘗泊舟虎阜山塘夜聞哭聲甚哀詢知其人負
旗丁債不能償乃鬻妻於商人行將離別矣洪泉惻然以所
攜貲本十數金代之償不足并衣被付之不告姓名而歸

熙雍間鎮中有孝子如金仲和朱尚侯陳仲嘉兄弟戴桂輩至
同治七年始題旌金仲和孝事父母人無間言年逾六十
猶作孺子慕有石慶親滌廁踰之風親喪哀至骨立家貧竭
蹶營葬於急水港北每晨起必渡至墓前泣拜時或無船可
渡則隔水遙拜而返朱尚侯業衣工事孀母盡孝寒夜無爐

以身煖被俟母寢操作竟夕藉以供甘旨數十年如一日陳仲嘉兄弟屠者也善事孀母冬月輪流溫被供養侍奉下氣怡聲先意承志古人色養不是過也戴桂字振宇鎬孫父渭臣母邱氏嘗割股療夫疾逾年夫仍歿氏乃織席營生撫桂成立其後邱氏病篤桂亦割股肉煮湯以進因得愈人謂非此母不生此子

蔡孔彰業星卜處已謙恭待人誠篤親族有匱乏輒減餐以濟之家貧恐食指多無以供日用乃爲其弟娶妻而已則終身鰥居願留有餘爲先人之未葬者營殯也卒至賣志以殯陶琳鄭載颺沈靈初諸人高其義爲醵錢葬其九棺云

陳再字與常庠生家本寒素先人所遺田產悉讓諸兄弟而已無所得專以課徒自給時復分束脩之餘周其寡嫂孤姪嘗遇一人持簿向之索舊債詢其家世與再素未嘗往來者其人語頓塞而有躊躇之狀再曰雖然汝必有急用故也乃以數百錢與之後知其人殤一女無以殮因爲此耳其待人忠厚類如此子鴻字明書號秉木吳庠增生嫻習經學與人言是非曲直指陳不諱著有秉木筆記凡前輩之嘉言懿行採錄無遺

陶氏諱兆彝字鼎臣煦高祖也六世祖諱汝益字虞卿明末庠生自揚州避地至鎮五世祖諱麟祥字聖來以課徒脩脯

親先高祖幼承庭訓宗程朱之學設帳郡城所與遊者類皆善士中年後學益純粹爲一鄉人倫表率乾隆乙丑元和張邑尊曰謨舉爲鄉飲賓先高祖以齒未尊而德未修力辭之弟兆景字星臣年二十七妻歿以兄有子遂終身不再娶性耽山水必窮其勝詣修養之術恆閉門靜坐乾隆辛巳恭遇覃恩給九品冠帶卒年八十

章騰龍字覲韓號箬溪晚號綠天永廉從孫博涉多才藝數應試不獲雋時文人往往兼習武騰龍因是遂轉而入長庠爲武生其甥吳江楊俊任廣西興業縣往佐之掌書記并遊粵東多得江山之助學益進凡地勢奇峻民俗詭異一皆筆之

於書成嶺南雜志粵遊紀程二集晚年採輯里中故實作貞
豐擬乘其原本頗不俗多爲後人改竄乃失其真餘所著如
綠天書屋詩文集駒隙志清夢錄金閫婆子話稿存於家散
佚過半工界劃畫兼善傳神從子秀恂瑩均永廉曾孫秀宇
摺書少穎悟嘗從吳江費洪學周振業游攻制藝不售亦入
武庠友于兄弟嫻睦宗親雍正癸丑歲饑與陶剛惠善圻父
子創施粥於永慶庵元和李邑尊世金嘉獎焉乾隆戊辰辛
未間又饑與其弟恂瑩等首倡平糶騰龍修族譜秀助之多
所增益卒年八十一恂字凌湘嘉善武生以詩酒自娛著有
蒔蘭軒存稿六卷瑩字幼瞻國學生早歲受業於陶琳兄弟

頗器賞之雍正甲辰法學使海嶷試已得雋以覆試長題誤脫其一節遂與里人張見龍同被擯既老於宅後栽花疊石集名流觴詠其中卒年七十瑩子履泰字以興吳庠生勤學長於春秋左傳

徐鏞字允恭一字韞躬楣孫乾隆丙辰元庠恩貢生

府志載好本姓朱

爲表潛闢幽之文有馬朱氏居鎮西南之南莊村實有貞行鏞旣上其事於學使得題額而爲作紀畧復以力不能乞旌典更爲文以廣募同學之助也尤擅駢體文今其稿僅獲錄存者數篇亦零亂不易辨客授四方從游者甚衆館郡城時李太史錦奇其才出所著文稿屬爲刪潤其見重士林如

此卒年七十七門人私諡端介先生

徐稜字殿方一字甸芳上麟曾孫乾隆庚午元庠歲貢生父濟
字贊皇府庠生敦行勵學鄉試嘗首薦終見擯稜亦懷才不
偶泊如也居鎮之後港疊石爲園多植佳果日吟詠於其中
因以磊園自號焉

陶善圻字樹聲號判花天民孫剛惠子也構見南草堂於後港
爲讀書處初入吳江學後推收補元和廩膳生乾隆戊午科
中副榜入國子監肄業 欽取內廷教習充補正紅旗官學
考授一等州同補宗人府正黃旗覺羅學督課頗嚴峻以面
斥王世子觸親王怒遂去官閱數年禮部侍郎王安國憐其

才舉復正紅旗官學教習期滿引見以教職用晚就四川學政葛峻起之聘校文成都卒焉年五十七善圻湛深經學著有春秋左傳合解四十卷詩序集解十二卷工詩壯歲著覆瓿草在都著南雍宗贊二集入蜀著由庚集素與沈宗伯德潛爲同年友甚相善及其子雲錦刊覆瓿等三集爲見南草堂集德潛爲之評選而由庚集則別行也

沈旭熙字元昇吳江按察司副使琬之元孫自鳳之曾孫也自鳳字君儀工詩嘗與耆英社爲鎮中陳氏贊堦遂家於此旭熙少孤家貧爲塾師不事制舉文而好讀書沈靜寡言惟與之講論經史則亶亶不倦無事恆獨坐月夜必立於門外俯

視清流徘徊不去人問之答曰我自樂其樂我不能言其樂也

俞達字萬通吳庠廩膳生曠達淡於榮利於學無所不窺嘗攷三江故道力主張守節之說謂白蜺江上承下注袤延匹於松江其爲古東江無疑諸家以爲松江支流不足當三江之一者皆臆度非身歷也達所居池上草堂適面江前臨池亦與江水通遂自號曰東江工駢體文尤長於詩古風力追漢魏近體專宗晚唐吾鎮數百年上下品詩者當以達稱首著有池上草堂詩鈔子濂字冠三號信齋元庠廩貢生得其父之傳尤精訓詁之學於學庸註疏多所發明教授生徒循循

善誘中年後品益粹爲後生表率初濂之入泮時有白鶴翔於庭至嘉慶戊寅重遊泮宮復得白鶴來翔之異余金熙朝新語稱爲人瑞洵不誣也卒年八十五

陸起仙原名起龍字健純號潛廬湖元孫吳庠生專經博古卓然名家兼通易數之學占驗多奇中嘗晨起焚香及門一學徒入而香火有爆聲起仙默占之謂其人曰汝晨出久今速歸父暴疾殆矣歸而已易簣澄虛道院主將於門前建一樓起仙爲之占曰賃於人獲厚利然不歷久終當爲他人有也已而果然秋日晤一友與立談有人舉兩手招友曰來起仙曰此去大吉得飲酒持螯象招者驚曰仙人也其精如此而

於太乙壬遁等書尤習之熟手自刪訂錄存者數十種時從學甚衆起仙因其性之所近使各成一藝居恆日記時事投諸囊中積年成書爲潛廬叢談若干卷工詩著有耕餘小草潛廬獨嘯諸集善書得草聖三昧寸紙尺幅人爭寶之子家寶字興山吳庠生克承家學課徒自給不營分外事筆瓢屢空晏如也從子椿字靈一號散木吳庠生博涉經史尤精選學手輯增廣事類賦四十卷其餘諸藝無一不繼武起仙

沈天相字士奇作霖從子吳庠生爲陶善圻入室弟子專攻經學絕意進取待人忠信恂恂似不能言客授四方爭相延致工書得歐顏筆意子諤字昂若號懋堂嗜吟詠精醫理諳內

養之功卒年九十著有行餘小草

鄭斌字德純號雪漁任曾孫乾隆壬辰長庠恩貢生貢率曠達
善書畫山水師董文敏尤善繪洛神晚年愛東洞庭山之勝
卜生壙於其間遂徙居焉著有雪漁吟稿從子鶴姿字振玉
號芝田元庠增生少與陳再章騰龍張見龍諸前輩遊故學
問人品卓卓可稱工詩筆力豪放長於歌行著有芝田詩鈔
朱同仁字惇五號可齋元庠增生敦倫紀崇信義人以緩急
相求應之無德色而其自御衣食雖處華廛與寒素相若所
居詒燕堂本雲南昭通府同知徐忠亮沒官之產同仁購得
之旁屋數十椽仍讓徐氏兄弟輩居焉故徐敦復感其德爲

賦讓宅行傳播當時遠近稱爲長者好蓄書籍每一書有二
本正本謹皮藏副本供誦習也善鑒別書畫羅致甚夥黃孝
子白鹽尋親真蹟其最著者所著有詩文集貞豐聞見錄仲
子春霆原名鎰字受之號棣華府庠增生虛已下人橐筆遨
遊所至輒與知名士交以故學問淵博羣奉爲老斲輪手嘗
館鎮中章氏章不戒於火同仁詩文集并燬焉春霆以不能
保其父之書生平謂爲至痛季子春靄原名鐘字萬之號杏
雲與春霆齊名春霆入府庠春靄又同入元庠故有雙丁之
譽

沈佑民佚其名敦孝友性更謙和善醫每臨診處方務盡其心

嘗曰醫以濟人仁術之最切近者必計利無仁心矣何以精所業暇則手一編不釋遇品學之士敬禮之恐後而於人之有過者又諄切規勸冀其改悔而後已年八十餘卒

徐文謨字覲揚玠從子事親曲盡孝道乾隆七年秋母病篤醫藥無效乃割臂肉煮湯以進病旋愈後其父病劇亦割臂療之年四十父母相繼歿文謨哀毀過節遂致疾而卒同治八年題旌孝子

陶金校原名雲錦字退思號劍峯善圻子年十五隨其父之都入太學爲肄業生沈宗伯德潛以國士目之在京十年所交皆四方知名士繼侍其父至四川歷太行太華經棧道劍閣

步萬里橋謁昭烈武侯祠遊青羊宮訪少陵草堂及浣花溪
錦城諸名勝悉載詩稿遊記中越一載而善圻客死成都金
梭扶輓以歸嘗創建洗鉢亭於永慶庵後集名流舉詩酒之
會倡和篇什哀然成集旣而愛洞庭東山之勝僑寓白沙灣
旋館西山李氏遂家焉晚歲因章鵬龍貞豐擬乘復採近事
爲周莊志未脫稿而卒著有應酬摘要三字經註畧致遠軒
詩文集重修族譜等藏於家

徐昌基字閣伯號小鶴敦復子元庠增生博學多才爲沈宗伯
德潛入室弟子文名藉甚詩亦獨具性靈著有愛日山房詩
鈔家貧嘗寒夜無衣母方疾力作以衣之昌基因自繪授衣

圖以紀母恩遠近知名士題詠殆徧蔚爲大觀弟泰階字來仲能詩生三子錫齡字鵬貽號厚卿嗣昌基後元和廩貢生候選訓導改就府經歷著有七嬉錫亨字會卿官河南洛陽縣尉錫疇字範韓官東河分司皆以賢吏稱

徐暹字升如號晉齋校從子吳庠廩貢生兄昶字秉乾號丙軒元庠生與暹並負才譽時郡城比之二陸長洲韓暢慕暹名命子來潮遊其門暹因以女妻來潮及暢官江西泰和縣復延暹幕下甚相得也所著詩文頗富惜身後多散佚僅有存者

徐敦仁字步雲號養拙玠孫國學生自江澤村遷居鎮中好讀

書間事貨殖有餘卽分潤諸親朋嘗與許景運輯江澤小識
遇勝蹟加題詠焉著有聊存草

沈文淵字誠若嘉善武生自寺巷村遷居鎮中敦本務實勇於
爲善元和黃邑尊建中舉爲社倉長經理積穀子本仁字體
乾候選州同早歲喜狹斜遊所交皆匪類及父歿人有言其
不出三年必傾家者本仁聞之乃置酒召諸匪類飲各贈以
錢而告之曰我今當爲支持門戶計不能再與諸君遊也由
是閉門謝客經營家業於所居大業堂側拓創敬業堂宅廣
厦百餘椽良田千餘畝遂爲一鎮巨室孫偉烈字麟標號樗
庭國學生苦志勵學無異寒素長於詩所著種花吟稿體物

工麗嗜飲好客時舉詩酒之會成同人唱和集繼照字鴻達
候選從九品性剛直遇事侃侃而談無所顧忌凡鎮中善舉
恆樂爲之領袖

戴惟瑛字升于之僑族曾孫慷慨好義遇有攘弱暴寡者必悉
力扶助任嫌怨不避時有土棍俞七陳大馬阿壽蔣勝等結
黨橫行人無不側目數笞責荷校終不悛乾隆辛卯夏俞等
又爲不法事惟瑛不平正言厲色以斥之是夜四人各執刀
斧斬門而進惟瑛與家人避去而家中器用盡毀焉乃控於
林邑尊宏德邑尊廉得其實流俞陳煙瘴地問馬蔣徒罪遂
除一方之害至若胥吏爲暴於鄉則尤攻許無稍憚事親孝

嗣母薛氏年至九十九生父見龍年至八十一時惟瑛亦耆年猶作老萊之慕

諸汝霖字仁膏號杏園府庠增生鎮東北潁村人下帷刻苦健於爲文嘗從郡城李章埳遊得其傳四薦秋闈不第所著時藝有杏園遺稿子乙照字向煌號竹亭國學生遷居鎮中性至孝父患癘疾醫禱無靈乃嚙左臂肉和藥以進病旋愈越數年父母相繼歿盡哀盡禮世業儒督課甚嚴子邦達字信孚孫文煥字魯生並爲邑庠生乙照晚歲以詩酒自娛年至八十卒同治七年題旌孝子

蔡永言字孝維號玉樵幼就塾卽喜爲繪畫之事及長徧訪名

家臨摩舊本專精人物深得陸少微筆法兼工山水花鳥求
者無虛日尤擅大幅天官至今稱蔡天官云弟子沈玉蟾字
芝堂傳其術長於山水點綴雪景別有天趣閒作篆隸筆亦
蒼古

周錫璫字鍾溪號芥舟晚號葭湄居士初攻時藝一試不售輒
棄去以經學教授弟子嚴定課程性耿介不苟取與字法端
正尤好書手錄口誦不倦家藏三別裁集宋金元詩選及前
輩詩文集高盈尺皆其鈔本也工詩著有寄寄吟稿

謝日升字震揚經學得其舅氏陸起仙之傳從遊者常數十人
性友愛教養兩弟曲盡其道工詩著有草塘漫錄

陶氏諱秉信字儒珍號樸齋 覃恩貤贈承德郎煦祖也曾祖

諱繼潛字晉賢國學生嚴以律已儉以持家至於事親旨甘
必備工吟詠著有運甓齋詩稿先祖受業於舅氏陸起仙經
學而外旁及雜藝太乙壬遁諸書俱手錄副本性曠達好交
遊以家業中落故舍儒服賈然承辦善舉甚力鎮中懷善局
施棺助葬創自乾隆庚寅迨嘉慶初而日弛先祖集同志重
爲整理置義塚備葬船以時掩骼理齒至今遵之先祖生伯
父及先父兄弟三人長保宗字鳴高號西樵國學生 貤贈
儒林郎嘗見鎮西南有地大雪不積因架屋爲糧食牙行漸
拓其基建豐玉堂宅百餘椽宅邊築小神仙館疊石鑿池極

亭臺花木之盛道光壬辰癸巳間曾承顯平翰兩邑尊委辦
漕糧俱信任之時相過從焉次興宗字承謙號北溪嗣高叔
祖兆景後 馳贈奉政大夫孝友成性明幹多材初於鎮西
北購椿壽堂宅亦設牙行交友誠馭下寬人有緩急推解無
吝色延品學兼優之士以課子孫晚年因先父歿時煦兄弟
幼孤見則恆垂淚未幾丁本生母憂遂鬱鬱不樂以歿幼卽
煦之先父諱邁宗字企皋號東籬 覃恩敕贈承德郎少佐
父兄業賈而勵品行兩兄以宅隘分遷先父仍奉二親居故
廬先祖歿擗踊哭泣兩目久腫事先祖母尤以孝聞好施子
重然諾道光癸未大水倡舉平糶時浮屍充積林文忠公則

徐方任蘇臬司勸諭各善堂就近收埋先父乃獨任懷善局
事行詣詳載寶山蔣敦復墓誌

陳晉字輝士號曉莊鴻子長庠生恂恂儒雅而與人論文則口
若懸河工詩著有寤言草弟勰字佩蘭號墨莊潛心制藝終
不得一矜因刊其文爲墨莊課藝工詩著有省頭草淞溪寄
迹吟二集晚歲取章騰龍貞豐擬乘增輯付梓雖刪節處多
不逮原本而此書實藉以存不可謂非其功也晉子玠字毓
琛號岷雲長庠廩貢生負才矜博矯矯不羣嘗遊幕維揚賢
士大夫爭與之交惜亦不得志著有岷雲詩草

朱青雲字鎮嶽號隱軒好披覽而不喜爲帖括之學教授生徒

因材而篤字法歐顏求書者無虛日時與二三知己詩酒流連雖瓶罄囊空不爲輟著有隱軒吟稿

陳豫吉字明易自幼勵志儒業年五十始入元庠爲諸生居恆博帶戔冠動必以規矩遊其門者類多謹飭之士

馮燮字調元本吳江籍世業小兒痧痘科燮自幼習之性復敏悟比懸壺門已如市忽患目疾竟失明乃令弟子誦讀於前已爲之講解冥搜默會悉中窾曲如是十年而目復明凡痘證之順逆生死定以時日不爽毫髮時有仙人之稱遠方聞聲聘之往者踵相接方案洋洋數百言或干言徵引切實論斷精詳人皆欽其博雅同時有胡倫宗佚其名亦業小兒科

惟不善案語然方藥無不奇效與變相頡頏

鄭祥徵字繼善號少迂晚號念山斌子世習文科醫祥徵潛心研究不泥古方時奏神效嘗採輯歷代名醫議論成靈蘭集義若干卷鎮中舊有惜字放生諸會祥徵俱爲推廣行之好施予惟恐不及工詩著有念山草堂存稿子維嗣字孝仲維業字又新均克承其先志人稱爲積善之家云

朱文潮字學韓號省堂同仁從孫早歲小試獲雋時已歸爲風雨所阻不及應覆試僅補僧生自是棄去客授四方其中表錢國瑞官蜀之廣安州延之偕往國瑞卒於任文潮爲治其喪舉柩以歸營館郡城張培敦家時馮宮允桂芬居鄰近尚

童穉文潮見而奇之羅致塾中授業焉工書筆力邁勁人爭購之

朱福謙字心齋業星卜堪輿尤精易數占休咎多奇驗爲人相地必曰陰地好不如心地好且言不犯忌水卽是佳城至於禍福之說惑世之術耳以此士大夫家多延之晚歲搜集鎮中先輩詩篇繕寫兩冊臨歿屬其子曰慎勿毀棄後三十年當有求此者旣而售於戴氏煦刻貞豐詩萃時假得此本適符三十年之數

唐際會字冠時號雲巖國學生嗣父燿字翔九號炳齋府庠生年未三十而歿嗣母吳氏以節旌際會長身鶴立談論風

生嘗與朱春霆陳玠韓來潮以詩文相質難著有雲巖賸稿
工書得趙吳興筆意子鍾字祝三才敏學瞻小試數前列早
世媳章氏亦以節旌從孫兆淇字右泉元庠生爲人謹厚
古道可風課徒尤誠懇口講指畫不遺餘力及門多所成就
卒年三十九

韓來潮原名兆鰲字尺五號滄霞晚號念喬府庠附貢生世居
郎城父暢字遂生號譜華以進士選授江西泰和縣知縣多
善政調清江縣卒於任來潮爲徐遲賢壻因遷居鎮中屢應
鄉舉不售棄而讀律始就兩淮劉都轉澧之聘嘉慶癸酉百
文敏公齡防禦彭城延來潮入其幕客遊三十載乃歸嘗與

戴其章及煦兩家兄弟叔姪結棠巢吟社迭相唱和來潮年最尊羣奉爲壇坫主庚申之變憂憤成疾而歿年八十有一著有綠雪軒詩存

鎮中以教授爲業而能勤於訓誨不誤人子弟者乾隆以前已各有傳至嘉道間則有張尚信戴恕朱願費鐘周金群白諸人張尚信字吟泉青庠生刻苦勵學及門從學者以身教以言教不稍懈卒以此致疾猶力疾課讀云戴恕原名謙曾字受益號筠軒惟瑛從孫國學生課徒嚴而善誘功倍他師工隸書臨摹曹全碑得其神似朱願字景程號雪門春露子專工字學合歐顏爲一家臨池揮翰至忘寢食人比之張伯英

云費鐘字紹鳧號練江家本寒素訓蒙爲業性廉潔不苟取
與三十後得瘵疾而歿費氏累葉書香其先世嘗延康熙庚
辰進士費洪學爲師後徐鏞亦曾館於其家故遊庠食餼者
代不乏人迨鐘歿而遺文賸稿散佚無存卽名號亦無從考
矣周金一名曰金字映庚號麗生屢應小試雖前列而終不
售工唐隸筆致獨蒼古年未四十而歿薛白字慕蓮號子吟
耿介絕俗工詩文頗自負中年境益嗇遂謂世無知己悉出
所著焚之旋卒

以藝術著名者嘉道間醫則有許國器馬鳴鶴韓寶篋諸人畫
則有潘春生朱觀禘禱諸人許國器字玉田號雲椒青庠

生自金澤遷居鎮中兩耳重聽好吟詠尤以醫擅名專精傷寒分經辨證深得仲景之旨故治疾幾臻十全馬鳴鶴字子和學醫吳江日與徐熾遊因習外科得其治法方藥於金鑑歌訣尤熟讀無遺其施治迥異他人韓寶箴字青士來潮子從九品銜始習女科旋理大方脈用藥輕而多效屢爲當道所褒獎潘春生字芳林號香泉語言蹇蹇恆默坐無聲與人論事則達之於筆工傳神並精篆刻朱觀字惠吉號桂軒春霆子擅傳神兼涉山水花卉訓蒙甚嚴褚壽祺字敬齋工繪蝴蝶栩栩欲活與從兄元照同門時有陶牡丹褚蝴蝶之稱字法率更筆致挺秀

費秀元字玉成候補都司 誥贈武顯將軍自吳江之計巷村
遷居鎮中性任俠好結納每爲人排難解紛咸豐丙辰水鄉
多盜平太守翰檄台督捕巡緝未幾以檄緝盜魁沙哥不獲
遂繫獄而沙哥已反正於嘉興徐莊愍公有壬知之且察秀
元才可用乃出諸獄而檄募槍船助守各門然倉猝僅得七
八十船從郡紳韓都轉崇朝夕督巡至四月十三日粵賊陷
蘇城力不及禦急與崇奪門出歸而益募槍船以圖愆復兼
爲保衛鄉里計六直車坊同里黎里諸鎮先後被賊秀元均
往救分船守之賊踞蘇後怯於水關而近地如金澤盛澤北
厓各有集衆募槍船者約一二千艘往往各不相下間尋干

戈然得秀元一言則立釋以此皆尊奉秀元已而欽命督辦團練大臣龐閣部鍾璐檄令秀元依舊自行團練爰爲約束以待大兵雲集隨同進剿僻中丞煥檄令秀元團集槍船保衛鄉里並偵探賊情隨時稟報秀元持此以示諸鎮之募槍船者皆用命十一年冬吳方伯煦檄令秀元整備船勇堵禦封叟門援賊同治元年春秀元疾病先是咯血闔鎮爲之持齋祈禱至是復作卒附鎮數十里內以其有保衛鄉里功咸惋惜之

徐勳字佑堂號月江懷恕六世孫年十四卽訓蒙藉館穀以養嗣母及本生母習小兒醫推拏方藥頗能中窾謹身節用性

仁厚無疾言遠色亦不臧否人物有妄人加以非禮引避不與校不減婁師德唾面自乾風然能急人患難不辭勞怨方勳之壯也嘗撓危疾恍惚有神鞠之勳以嗣母在堂父喪未葬告神檢冊許加壽一紀勳有難色神曰無慮再好再加病遂痊故於祭先祭神之事尤極誠敬咸豐元年余邑尊龍光聞其名舉爲鄉飲賓旌以端品善行額卒年八十有六

沈林惠字庚揚號翠嶺世居鎮西吳江之雪巷村國學生候選布政司經歷家有田萬餘畝而取租平爲遠近最每歲四月耕林惠田者計畝貸米三斗至秋收還之不權子母凡農民貧者就豪家貸米必計值加子錢至期還以錢曰生米貸時

米方貴還時新穀登必賤往往至倍稱以故農重困耕種惡田者無食生米其子孫行之以爲常租入必餉數倉雖高值不售曰無蓄脫歉歲何以平糴又建慶善堂施棺掩骼獨力舉之好藏書籍尤多刊刻遺書如張氏潮楊氏復吉所輯昭代叢書迨氏鶴壽所校王氏鳴盛蛾術編吳氏翌鳳國朝文徵朱氏珣古文彙鈔幾千卷卒年七十有七

徐麐字架珊號東山敦仁孫候選布政司經歷兄憲字君懷號半江善醫於婦科尤神而明之工詩著有半江詩稿麐博學能文性曠達小試一不售輒棄去專事吟詠與人贈答灑灑數百言不失溫厚之旨著有東山詩草處己以儉待人以和

於善舉尤謹謹焉卒年七十有二

馮景澄字子儀世居鎮東南官宇圩村青浦庠生道光癸卯舉人早歲刻苦自奮從漂陽教諭倪皋受舉業得其淵源敦倫紀廣交遊父喪致客舟楫闕咽迄今人猶稱道之從弟時昌字霞川青庠生居鎮中積學早世時昌孫世誠字震伯然弟之壻也受業於熊其英閉戶讀書外人罕見其面未弱冠爲諸生旋染瘍疾而卒士論惜之

陶琴泉原名元熙字質堯號勤補國學生煦從兄也伯父諱興宗止生兄一人故責望甚切延其外祖吳江副貢生王友浩課之讀書年十五遭母喪恆閉戶飲泣恐傷伯父心繼事後

母惟謹未幾遭伯父之喪服甫闋又遭後母之喪遂絕意仕
進而肆力於詩從松陵詩人葉樹枚遊著有有真意齋吟稿
卒年四十二以子甄官 誥贈奉政大夫甄宇在和城萊坪
國學生候選同知自幼受業於朱先生霞燦讀書聰慧字法
亦娟秀屢試不售乃寄情詩酒嘗入棠巢吟社晚年營別業
於宅左顏曰息廬因以自號繪圖徵題得詩頗富卒年五十
五著有息廬吟稿

陶元照字容光號臨川煦從兄也伯父諱保宗生從兄弟四人
兄爲仲議敘八品 敕贈儒林郎性沈靜好涉獵度數之學
以屢試不得一矜遂棄而習醫遊北韓山何其瑞之門於仲

景傷寒金匱外尤服膺東垣十書治疾多奇中工寫生最擅
設色牡丹鎮中有陶牡丹之稱其次卽從弟然原名元烈字
藜青號芑孫穎悟過人博覽強識善詩詞尤長於賦學吳江
陳壽熊以經義名當時弟從之遊學益進弱冠爲長洲庠生
咸豐辛酉登拔萃科弟自負奇特性又亢直好面責人過然
賢士大夫往往聞其名而樂與之交平生磊落慷慨不屑問
家計自 廷試報罷歸乃以筆耕自給攜妾賃廬於郡城孔
副使巷當道之徵詩文者不絕月課紫陽正誼兩書院無不
前列其構思必嘔心鏤血脫一稿士林多傳誦初嘗刻其所
作時文詩賦爲味閒堂集繼復刻續集三集賦比工峻而坊

間翻板四起矣從學者甚衆每爲之指陳利弊多至數百千言晚得喘嗽之疾而學愈勤雖輾轉牀褥間猶手不釋卷出其餘爲經生家言識解亦卓絕暇輒招三五親故杯酒論文辯駁闕肆人無以難之煦輯鎮志得其悉心討論釐定部次多所損益卒年五十一所存駢體文詩詞數百篇皆手自繕錄者

戴其章原名鈞曾字子秉號雙柑惟瑛從孫長庠附監生父觀成字迎求號吟舟國學生沈靜寡言能草書擅圍碁壽七十有八其章幼慧能文小試輒前列遊庠後得咯血疾嘗膺鄉薦不售遂棄舉子業壹意養閒寄情吟詠著有雙柑詩草晚

歲益病杜門不出歷十年卒弟其相原名鉅曾字子式號笠
農與其章孿生性剛直遇事敢爲尤健於爲文長洲王邑尊
錫九奇其才特拔冠軍張文宗芾復以第一入泮己未借試
浙闈中副車道光己酉水災大吏勸賑專責紳董不假胥吏
手其相躬赴各鄉核其戶口給之毋濫毋遺庚申之變費都
司秀元在鎮招集槍船其相亦與同志募丁防禦晝夜督巡
閱三月烽煙日逼憂勞成疾而卒年四十有四工漢隸筆力
遒勁詩學韓蘇硬句盤空著有棠巢詩錄

沈晉錫字侯康號縉生偉烈孫幼聰慧過目成誦年十三應小
試有神童之稱而至老仍不得一衿遂以教授終所著詩有

秋吟小草子洪疇字益之服賈蘆墟鎮咸豐辛酉十一月二十一日嘉善賊北擾金澤鎮及趙田村時晉錫方寓居趙田洪疇聞警急駕舟省父或勸阻之答曰父難不赴庸爲人乎行至東固蕩賊船紛集不及避被賊擠溺死年二十七同治七年題旌孝子

費嘉穀鐘從孫父嶧材患咯血疾時嘉穀四歲見母徐氏垂淚必對泣不止明年春父歿母子痛哭見者爲之流涕七八歲時人與之食輒懷歸遺母母有疾侍奉至忘寢食同治乙丑母成癘疾七月嘉穀亦病在牀至十七日夜同室鄭氏睡夢中聞呼母聲出門去急起燭之母子俱不見蹤蹟至報恩橋

北見一尸人爲撈視乃徐母也卒不見嘉穀明日卽於母溺處得之兩手上抱猶作救援狀蓋由黑夜倉皇急欲救母遂奮身以殉年十有四同治七年題 旌孝子

陳永奎字少山童年值粵賊亂同里費君金綬練民團永奎從金綬之弟金組戲爲擊刺備禦之事迫金綬以民團隸撫標水師爲新後營永奎遂從軍隨攻平望黎里等鎮蘇州葑門賊壘及吳江嘉興等城積功保舉守備銜儘先千總並 賞藍翎事平歸長江標借補金陵營左哨外委永奎幼孤志在顯揚其先人會同治十一年 覃恩遵例請封祖父爲武德騎尉五花 誥下居人稱榮焉彭宮保玉麟時巡閱長江所

至持正彈劾諸營汎多聞風瑟縮而永奎數奉其檄奔走左右用是擢安慶營把總未赴任卒年三十六永奎之在金陵營也同寮謝蘭生愛之妻以女生二子及卒妻扶輓歸其喪於家

道光間有孝子二人曰陳世傑曰蔣惕三近始從其鄉人采得因附錄之陳世傑吳江之吳家埭村人幼入村塾讀書卽略解孝經事親之道父晉惠早卒奉母任氏以孝聞母有疾侍湯藥惟謹母嘗病劇氣絕世傑大聲哀號母恍惚若有驚之覺者遂得無恙人以爲誠心所感越三年母歿遇忌日祭奠必敬有餘慕也性又友愛兄世英有殘疾爲之成婚終身誓

不分縣道光二十四年卒年七十四至今鄉黨猶稱之蔣惕
三元和之龍亭村人有孝行父患背疽幾殆惕三割左臂肉
和藥療之而愈繼而母病復割右臂肉療之亦愈家貧賣梨
膏糖以爲養兩臂以布裹人揭視之創痕宛然羣稱爲賣糖
孝子

周莊鎮志卷四終